



DEO OPTIMO MAXIMO UNI ET TRINO,

VIRGINI DEI-PARÆ, ET S. LUÇÆ,

Medicorum Orthodoxorum Patrono.

BIU Santé
Médecine
Paris

QUÆSTIO MEDICA

QUOD LIBETARIIS DISPUTATIONIBUS
*manè discutienda in Scholis Medicorum, die Jovis decimâ - quartâ
mensis Novembris, anno Domini M. DCC. LXXXII.*

M. JOANNE-NICOLAO CORVISART-
DESMARETS, Doctore Medico, Præfide.

An Retina immediatum Visionis organum?

I.

UT Cœli enarrant gloriam Dei, sic sapientiam illius & providentiam
enarrat non satis miranda corporis humani compages. Solidis constat & flui-

dis, eâ ratione inter se conjunctis, ut ex illorum connubio machina exurgat pneumatico-hydraulica, legibus subdita Mechanices, Statices & Optices. Machina illa quæ summi Opificis summum est artis opificium, innumeras exercere valet functiones, variisque ditatur facultatibus, quarum cognitio Medico æquè conducit, ac ventorum & graduum longitudinis & latitudinis, nautæ iter ad longinquas regiones suscipienti. A libero & integro harum functionum exercitio pendet sanitas, inæstimabile naturæ munus illud, quo sublato, vita molesta fit & incommoda.

Cum verò conservatio vel redintegratio sanitatis objectum sit Medici, quomodo illud efficere valeret, si in quo ea consistat eum lateret; si naturæ agendi modum non apprimè calleret; si omnium functionum & facultatum quibus obeundis aptum est & idoneum corpus humanum, statum naturalem non sedulò investigaret? Has inter facultates, sensus præcipuum profectò locum obtinent. Illorum enim ope nostræ conscii sumus existentiae, nobisque innotescunt relationes quæ nostra inter & ambientia intercedunt corpora, & exinde innumeræ in animâ nascuntur ideæ, ita ut cum Aristotele dicendum sit, nihil esse in intellectu, quod prius non fuerit in sensu.

Sensuum acerrimus & utilissimus procul dubio visus: etenim hujus ope quæ nobis utilia vel nociva esse possunt cognoscere fuit concessum: ejusdem auxilio naturæ miracula indagare ac scrutari, sicque à visibilium rerum spectaculo ad invisibilis Opificis sapientiam quocumque modo licet assurgere. Cæteros inter sensus nullus, ex quo tot objectorum, nec tam citò, nec tam distinctè oriantur perceptiones. Perlustra oculo camporum patentium æquora, occurrent confestim prata floribus undiquè conspicua, amnes per illa flexuosis ambagibus, modò leni, modò rapido fluentes cursu, pecudes sine lege errabundæ & pascitantes exultantesque arietes, arbores vel coacervatæ, vel per agros & per itinera dispersæ, villæ, tuguria, pagi, oppida, colles, montium juga, nubes in aëre suspensæ, cœlumque mari junctum; quæ quidem omnia uno & eodem, ut ita dicam, ictu ferit oculus. Si tot simul sonis percuterentur aures, si tot saporibus lingua, tot odoribus nares afficerentur, quot simul objecta perspicere potest oculus, quanta oriretur in animâ sensationum confusio!

Ut verò sensuum nobilior visus, ità oculus organorum omnium corporis humani præstantius & delicatius. Cætera enim antecellit structurâ & objecti sui naturâ, quod quidem lux ipsa est, materia simplicissima & purissima quæ animam afficere valeat. In illo reperire est compendium omnium ferè œconomiae animalis legum. In eo secretiones plures quam in aliâ quâcumque parte observantur, & multò magis perfectæ. Animæ haud immeritò dicitur speculum, cujus manifestat pathemata, aliis facillimè & citissimè communicanda. Ex illius vividitate, vel languore physiognomiae ingenium elicere fas est. Oculum Galenus organum lucidum & solarem animalis particulam appellavit, quem Plato vocaverat partem corporis nostri præciosissimam, divinam, ætheream, quæ lucis usu mortem à vitâ distinguit; undè profectò illud adagium: *Qui dat videre, dat vivere.*

Omnes inter partes ex quibus conflatur organum illud præciosissimum, una existit cæteris longè præstantior, ope cujus objectorum imagines ad sensorium usque commune deferuntur. Circà illud objectum inter se dissentiunt Physicorum celeberrimi: alii enim immediatum visionis organum habent retinam, choroïdem verò alii. Inter posteriores quorum princeps Mariottus, pauci annumerantur Anatomici; fabricam enim oculi apprimè callere satis est, ut in propatulo veniat illorum error. Itaque hanc quæstionem aggredi & solvere nefas, nisi ritè perpensâ oculi fabricâ,

I I.

OCULI Bulbus membranis constat pellucidis & opacis, humoribusque ferosis, lymphaticis, & gummosis. Membrarum extimior, quæ putaminis oculi majorem constituit partem, versùs fundum est perforata, ut nervo optico ingressum præbeat. Parte posticâ crassior quàm anticâ, è fibris conflatur tendinæis inter se quâquâversum implicatis perindè ac fibræ cutis, sed densiori modo, ità ut ex illarum compage minùs flexilis exurgat membrana, paucioribusque stipata partibus vasculosis, nervæis & membranaceis, cute tandem durior, σκληρόδης, seu sclerotica dicta. Membranam illam non esse duræ meningis propaginem, ut autumant multi(a) Anatomici, pluribus demonstrari potest rationibus ex ipsâ depromptis Autopsiâ, quarum præcipuæ è maximâ deducuntur differentiâ quæ

A ij

(a) Hieronim. Fabric. de Oculo vi. sùs organo; P. I, c. III. Adr. Spiegel de Hum. corp. Fabr. lib. X. c. IX. Lieutaud, *Essais Anat.* P. 127.

duram meningem inter & scleroticam intercedit. Illa enim membranacea est in omnibus animalibus, hæc verò ossea in nonnullis avibus, & in piscibus cetaceis cartilaginea. Secunda pars quæ cum scleroticâ oculi putamen perficit, à Græcis κερματοειδής, id est cornicularis, seu corniformis, seu cornea nuncupatur, ex eo quod cornu optimè referat. Tunica est pellucida, pluribus conflata lamellis, quarum unaquæque fibris constat tendinæis, elasticis & pellucidis, inter se omni-modè intertextis. Lamellæ illæ sibi invicem superpositæ, brevissimis ejusdem naturæ fibrillis inter se adhærescunt: hinc fit ut humores illas inter lamellas extravasati, sæpius in latum quàm in profundum expandantur. Cornea non est scleroticæ prolongatio, ut vulgò (a) creditur, ab eâ enim penitus differt, quod quidem invicto probavit experimento M. Demours, cujus lectionum per totum vitæ curriculum gratus recordabor, sacris nominibus & filii & discipuli. Oculo ferè putrefacto (b) in aquam bullientem projecto, corneam facillimè à scleroticâ separavit, & illi textu fibroso admodum tenui tantum necti cognovit, adeò ut illarum unio species sit ferruminationis, & eodem ferè modo inter se cohæreant, quo horologii manualis vitrum cum capsulâ conjungitur. Parte suâ anteriore & convexâ obvestitur cornea membranâ subtilissimâ, quæ adnatæ nomen audit, quæque propago est illius quâ induitur facies interna palpebrarum; interiore verò, seu concavâ, membranâ cartilagineâ peculiari. Illius figura non exactè sphaerica est, sed hyperbolica, vel parabolica ut observavit Scheinerus. (c)

Ultrâ corneam reperitur membrana variis insignita coloribus, & in centro circitèr rotundo pertusa foramine. Membrana hæc uvea vocatur, vel Iris, foramen verò quod nigrum apparet in oculo sano, pupillæ nomen audit. Septum efformat quo spatium corneam inter & lentem crySTALLINAM comprehensum, in duas dividitur partes inæquales. Spatium illud in quo uvea liberè movetur, camerae humoris aquosi nuncupatur; humore enim seroso aquæ communi similimo turget. Spatii verò illius pars antica & amplior, dicitur camera anterior, postica quæ multò minor est, camera posterior. Hujus autem existentiam in dubium revocârunt antiquiores Anatomici, & etiam nonnulli (d) ex neotericis. Cum verò lens crySTALLINA parte suâ anticâ convexa sit, uvea verò plana, nec ipsi contigua, necessariò reperiri debet aliquantulum spatii inter illas partes, quod

(a) Galen. de Usu Part. lib. X. c. III. Jul. Cæsar. Placentinus, de Oculi Fabricâ, (æd. I. c. XXIII. Joan. Riolan. Anthropol. lib. IV, pag. 415. Winslow. Expos. Anat. de la Tête, paragr. 214. Sennac, Anat. d'Heister, p. 691. Lieuraud, Essais Anat. p. 127.

(b) A. A. Reg. Sc. Acad. an. 1741.

(c) Oculi five fundamentum opticum.

(d) Lieuraud Essais Anat. p. 131.

posteriorem constituit cameram, cujus præterea facile demonstrari potest existentia ipsâ autopsiâ, in oculo gelu concreto. Uveæ ambo superficies, anterior alia, posterior altera, totidemque fibrarum observantur ordines. Superficies anterior variis conspicua coloribus, Iridis nomine insignitur. Ex fibris aliæ sunt orbiculares, aliæ verò longitudinales. Priores quæ circa Iridis interiorem limbum sitæ sunt, pupillæque sphincterem constituunt, uveam extendunt dùm contrahuntur & pupillam angustant. Posteriores quæ partem posticam occupant, uveam retrahunt, pupillamque dilatant. Fibræ orbiculares musculosæ sunt, totiesque contrahuntur, quoties lumine afficitur pars illa oculi, quæ immediatum constituit visionis organum: idem verò dici non potest de fibris longitudinalibus, quarum retractione dilatatur pupilla. Nam pupillæ dilatio ipsius est status naturalis, qui certissimè pendere debet à statu naturali fibrarum longitudinalium. Status autem naturalis cujuscumque partis ab ejusdem contractione musculorum oriri nequit, quod quidem œconomia animalis legibus prorsus adversaretur (1): undè concludere fas est, uveæ fibras longitudinales non esse musculosas, (a)

(a) M. Desmours. Act. Reg. Sc. Ac. Tom. II.

sed tendinæas & elasticas. Fibræ illæ eadem causâ generali agunt, quâ corpora omnia elasticitate naturali donata. Constringitur ergò pupilla contractione fibrarum orbicularium, dilatatur verò solâ fibrarum longitudinalium elasticitate nativâ, estque ipsius diameter in ratione compositâ gradûs sensibilitatis organi, & gradûs actionis quàm suprà illud exercet luminis præsentia. Illos inter binos fibrarum ordines, rete adest è vasculis nigricantibus in oculis nigris, leucophæis in oculis cæcis, sanguineis, lymphaticis & nervæis conflatum, ex ipsâ prodeuntibus choroïde, ambæque superficies, anterior scilicet variis conspicua coloribus, & posterior nigro obducta pigmento, membranâ tenuissimâ obvestitur, quæ cartilagineæ quâ induitur corneæ concavitas, est propago. Hinc fit ut pigmentum

(1) Cogereretur igitur animal, inquit Borellus, de *Motu Animalium*, ingenti & assiduo exercitio defatigari decursu totius vitæ, non ut opus utile animali perficeret, scilicet ut pondera sublevaret, sed tantum ut continuo conflictu impediret actionem musculorum; nempe laboraret ut nihil ageret, sed ut quietem animalis induceret; quæ ridicula & imprudens actio, absurda prorsus ac contraria esse videtur artificiosissimæ Œconomia quâ animalis actiones exercentur.

Illud nigrum quo obvestitur uveæ facies posterior, ab humore aquoso perpetuè allabente, nec abradi, nec dilui queat, undè prorsus innumera, visuique maxime noxia orirentur phantasmata.

Ultrà pupillam corpus adest pellucidissimum, lenticularis formæ, in sacculo sibi proprio, membranâ arachnoideâ dicto contentum, cujus hæmispherium posterius magis quam antèrius convexum, formæque donatur hyperbolicâ vel parabolicâ. Corpus illud à pelluciditate dicitur lens crystallina, & ab humore quodam gummoso efformatum videtur. Si enim in liquore acido maceretur, pelluciditatem amittit, quod ipsi cum substantiâ exoticâ illâ gummi arabicum dictâ commune est. Ex majori vel minori lentis crystallinæ convexitatis gradu, pendet videndi modus, ità ut si convexa magis quam par est, objecta tantum vicina perspiciuntur, unde myopia; si verò minùs, objecta tantum distita, undè presbytia, utraque vitris concavis vel convexis rectificanda. In palâ humoris vitrei ad anticam partem excavatâ insidet, ibique antèrius obfirmatur productione membranæ hyaloideæ, suprâ quam extenditur productio istius membranæ quæ humoris aquosi Cameras involvit. Hinc constat illius situm in capsulâ propriâ, non nisi à causâ externâ posse immutari. Aëri libero expositus crystallinus induratur & fit friabilis, ejusque particule sunt squamosæ, ità ut è squamis sibi invicem superpositis & contiguis, ut videre licet in bezoardo animali, vel capâ, constari appareat. Squamarum illarum unaquæque fibris constat totidem arcus referentibus, sibi invicem tantum contiguis. Lens crystallina in capsulâ suâ soluta est, videturque per juxtâ positionem nutriri, ope vasculi cujusdam lymphatici, rectâ viâ à centro nervi optici ad centrum usque palæ in anteriori parte corporis vitrei excavatæ, appellentis: ibi vasculum illud lymphaticum in totidem ramulos, quot sunt fibræ in unâquâque squamâ dividitur, quicquidem ramuli ad majorem capsulæ lentis crystallinæ limbum porrecti, humorem lymphatico-gummosum per totidem hiantes poros in cavtatem sacculi illius effundunt. Ætate provectiori obturantur illi pori, tuncque induratur lens crystallina, ità ut in propria capsulâ friabilis evadat.

Corpus vitreum ex humore lymphatico tantisper viscido, pellucidissimo, in loculamentis peculiaribus à membranæ hyaloideæ interiori lamellâ efformatis contento, cæteros oculi humores copiâ exsuperat. Loculamenta in quibus con-

tinetur humor ille lymphaticus, ità ordinata sunt, ut quæ versùs superficiem, ampliora, quæ verò versùs centrum, minora sint. Harum cellularum inter se communicantium, numerum, ordinem & formam, in oculo gelu concreto, & per axim bipartito, anatomicè (a) demonstravit Pater colendissimus, reperiitque illarum parietes multò crassiores quam fuisset suspicatus. Cellularum & humoris vitrei in illis contenti aggregatio quæ corpus vitreum constituit, lamellâ exteriori membranæ hyaloideæ quæ cartilaginea est & perlucida, obvolvitur. Exterior membranæ hyaloideæ lamella versùs anteriorem corporis vitrei partem ab interiore sejungitur, ad capsulam lentis crySTALLINÆ anteriori parte obfirmandam; ibique juxtâ lentem illam spatium relinquit inane, in quod tubuli ope insufflatus aer canalem fingit circularem, quem gallicè, *canal gaudronné*, vocavit illius inventor Cl. Dupetit (b), Pater Ill. Pourfour Dupetit, nunc hujusce Facultatis Decani.

(a) A&A. Reg.
Sc. ac. an.
1741.

(b) A&A. Reg.
Sc. Ac. an.
1726.

Haftenùs de oculi partibus quarum ope suprâ immediatum visionis organum radii luminis perveniunt, egimus. Nobis adhuc binæ supersunt describendæ partes multò majoris momenti, quibus solis inter alias possit adscribi visionis provincia; eæ sunt retina & choroides.

Retina quæ immediatè corpus obvolvitur vitreum, cuique tantum sit contigua, ipsius nervi optici est genuina propago. Substantia ejus pulposa & medullaris semi-pellucida & retiformis, undè nomen. Fibræ quibus constat, aded sunt exiles, ut ne ter millesimam sexcentesimam capilli unius crassitiem adæquare valeant, ut demonstratione saltem plausibili probavit Illust. Hook. Circà illius centrum observatur corpus exiguum, emicans, coloris albescentis, substantiâ denudatum medullari, quod quidem attentius est notandum.

Retinam inter & scleroticam adest membrana cui *πάροειδης*, *nveæ* vel choroidis nomen dedere antiquiores Anatomici, ob ipsius similitudinem cum uvâ vel chorio. Scleroticæ subjacet, cui adhærescit ope nonnullorum vasorum & nervorum interludentium, cuique ex omni parte, ut & ipsi retinæ, est contigua. Binæ in eâ annumerantur lamellæ, exterior scilicet quæ speciatim choroidis servat nomen; interior altera, quam à nomine patris sui Ruyfchianam appellavit Ruyfchii filius. Lamella exterior innumeris conspicua est vasis nigricantibus, ejusdem crassitiei,

sibi invicem appositis, non nihil eminentibus & vorticose dispositis. Totidem exhibent liras vasa illa vorticosa, fulcis subtilissimis à se invicem distinctas, sicut illæ quæ in extremitatibus digitorum deteguntur. Lamella interior seu Ruyschiana, exteriore multò tenuior, fibris tendinæis exilissimis, nec nisi ope microscopii conspicuis conflatur. Fibræ illæ mutuâ interfectione à posticâ hujus membranæ parte versùs anticam protenduntur, reiformemque æmulantur structuram. Sibi invicem sensim admotæ, coeunt tandem in anteriore choroidis parte, ubi tendinem efformant circularem, ex quo prodeunt fibræ crassiores ad majorem usque capsulæ lentis crystallinæ limbum extensæ, ibique conglutinatæ. Processus ciliares vocantur fibræ illæ, quæ unâ constituunt ligamentum ciliare.

Lamella Ruyschiana pigmento obducitur, lutofo, nigro, digitos inquinante, & à superficie illius, cui adhærescit ut calx parieti, facile avellendo, cujus ope hebetantur vagantes & inutiles visioni luminis radii. Pigmentum illud quod è vasis nigricantibus exsudat, in infantibus & adolescentibus crassius est & copiosius, quàm in adultis (a), sensimque labentibus lustris parumper dilucidius evadit, ita ut ætate provectâ, vix ullum illius remaneat vestigium, undè visus senilis. Hinc fit etiam ut in nonnullis senibus quædam perspiciatur ponè pupillam opacitas, quæ cataractæ incipientis mensitur speciem, visu tamen intacto remanente. Quodquidem in illis observatur, in quibus membrana Ruyschiana dilucidioris est coloris ob tapeti defectum. In illis enim, radii luminis majori quantitate ab humoribus & membranis internis reflexi, hanc referunt opacitatis speciem, quæ attentè perpendenda, ne intempestivum proferatur judicium.

(a) Cl. Dupetit, Act. Reg. Sc. Ac. an. 1726,

III.

OCULI bulbus ad sphæroïdeam accedit figuram, quæ quidem ad internas omnes illius partes in statu naturali continendas omnium est aptissima, quæque simul per pupillam majorem radiorum copiam admittit, eosque in minori colligit spatio; undè fit ut illorum ope, in fundo oculi depictæ imagines multò distinctiores appareant & vividiores, quam quæ suprâ parietem vel chartam in camerâ obscurâ

representantur: oculum enim veram esse cameram obscuram palam est. Si enim perfodiatur paries camerae ex omni parte clausae, ita ut exiguus lumini praebeatur ingressus, objecta extra cameram posita, supra parietem vel chartam candidam foramini ex adverso oppositam, cum propriis depingentur coloribus & in positione inversa. Hoc phaenomenon à J. B. Porta primò observatum, nobis exhibet mechanismum quo fit visio. Objecta enim visui conspicua supra immediatum visionis organum cum nativis coloribus & in positione inversa delineantur, ut sit in cameram obscuram, in qua objectorum imagines non nihil confusae, debilioribusque depictae coloribus apparent, ni ponè vel antè foramen lumini ingressum praebens, apponatur lens vitrea refringendis & colligendis radiis luminis apta.

Eundem in oculo profert effectum lens crystallina imò longè magis perfectum, ratione suae formae hyperbolicae vel parabolicae, omnium secundum Newtonem aptioris ad colligendos simul varios luminis radios, & ad eliminandas, tum refractionis, tum sphaericitatis aberrationes. Si verò lens crystallina aequipolleat lenti vitreae foramini camerae obscurae appositae, chartae ipsi aequiparanda est oculi pars illa quae immediatum constituit visionis organum. Cuinam verò parti assignari debeat nobilis illa visionis provincia? an choroïdi? sed caret dotibus ad id munus accommodatis.

I V.

IMMEDIATO visus organo ea debet esse texturae proprietas, ut luminis radiorum qualitates distinguere ac dignoscere valeat, perindè ac papillae nervae quae in extremitatibus digitorum deprehenduntur, qualitates corporum tactiles dignoscere valent. Visus enim tactus species, undè nervae duntaxat partes id munus adimplere possunt. Huic functioni obeundae impar omninò choroïdes, cujus vasa vorticosa, nigricantia, flaccida, nullam à nervis ducunt originem, quibusque nulla inest proportio cum exquisitissimâ radiorum luminis tenuitate. Impar etiam omninò lamella interna seu Ruyschiana, quae nihil aliud est, quàm textus fibrarum tendinaearum, retis formam non malè referentium. Præterea sola pars choroïdis ad quam perveniunt luminis radii, atro pigmento facillè digitorum ope avellendo, obducitur. Quà fieri possit, ut isti luto choroïdi tantum ac

rerinæ contiguo, concedatur visionis honos? quod æquè absurdum foret ac si quis dicat materiæ perspiratoriæ squallo epidermidi inhærenti, tactûs sensum tribui debere. Illud enim atrum pigmentum quo obducitur lamella choroidis interior, squallorem roris perspiratorii non malè æmulatur. Nam considerari debet ut perspiratio vasorum vorticorum,

(a) Prem.
Lec. de M.
Mariette à
M. Pecquet.

Sequenti innixus experimento, Illustrissimus Mariottus (a) choroidem immediatum visionis organum esse prædicavit. Duo objecta A & B satis conspicua, verbi gratiâ, duo fragmenta chartæ albæ suprâ nigrum parietem vel speculum, duodecim circiter pollices inter se distantia apposuit. His ita dispositis, & uno clauso oculo; alterum versûs objectum A direxit, quo attentè perspecto aliud etiam videbat objectum B. Tunc sensim recedendo eò devenit, ut objecto A semper clarè perspecto, objecti B imago prorsus evanuerit. Quodquidem evenit, inquit Mariottus, cum objecti B imago suprâ illam oculi partem incidit, ubi deest choroides, quæ reverà perforata est in fundo oculi ut ingressum nervo optico præbeat; undè conclusit, membranam illam immediatum esse visionis organum. Hoc experimento deceptus fuit Illustrissimus ille Physicus: illud enim accidit, quippè quod objecti illius imago suprâ punctum albescens incidit, quod reperitur in extremitate nervi optici, quodque ut potè substantiâ medullari denudatum, impressioni radiorum luminis insensibile est. Etenim si tantillum recedamus postquam objectum B videre desimus, illud iterum adspicimus, quod invictè comprobât, objectum illud evanescere quando suprâ nervi optici punctum albescens incidit; punctum enim illud multò minoris est diametri foramine quo pertunditur choroides ut nervo optico permittat ingressum. Si propter istius membranæ defectum objectum evanesceret, illud rursus nobis tantum appareret, cum longius retrò referremus pedem, quam ad illud denuò videndum retrò procedimus. Nempè cum arcus suprâ visûs organum peragrati sint in ratione spatiorum, arcus quem peragere deberet objecti B imago, in locum ubi deest choroides, multò major esset illo quem percurrere debet ejusdem objecti imago, suprâ minimum punctum album quod in optici nervi extremitate conspicitur,

MARIOTTUS & illi qui eo duce retinam immediatum visionis organum non esse contenderunt, sic suam conati sunt probare sententiam. 1°. Quia scilicet membranæ duntaxat sensu quodam exquisito donantur. Etenim, inquiunt, pulposa cerebri & cæterorum viscerum substantia, nullò sensu gaudet, dum membranæ quibus obvolvuntur sensu pollent exquisitiori. Hinc affirmarunt, retinam quatenus substantiam mollem & pulposam, insensibilem esse debere. 2°. Quod nimirum molliori & spissiori consistentiâ gauderet retina, ut objectorum impressiones exciperet, & usque ad sensorium commune transmitteret. 3°. Dixerunt choroidem tum propter nigrum colorem, tum propter opacitatem, admittendis rerum imaginibus esse multò magis idoneam. At eorum sententia tam vanis & futilibus nititur argumentis, ut choroïdis adhuc nunc inter clarissimos Physicos fautores agnoscere mirum videatur. Reverà, 1°. non merè pulposa est retina, membranâ tenuissimâ obvolvitur substantia medullaris, quæ quidem membranaceæ sensibilitatis debet esse particeps. Præterea ex eo quod doloris sensu non afficeretur retina, non inde sequeretur eam luminis impressiones sentire non posse. 2°. Mollior ipsius consistentia tanquam ratio sufficiens non potest admitti, cum eadem in auditûs organo animadvertatur structura. Quoad ejus spissitudinem, non tanta est quantam judicavit (a) Mariottus, qui eam lineam semissem adæquare judicavit. Ea enim in parte spissiori unius lineæ, aut circiter, decimam vix adæquat partem. At verò quando quidem ipsi tanta inesset spissitudo, quanta ipsi à Cl. Auctore tribuitur, hinc magis alba fieret & magis opaca, ac proindè minus idonea ad transmittendos choroïdi radios, quæ quidem hoc ipso minus posset judicari immediatum visionis organum. 3°. choroïdis niger color suâ quam retinæ gratiâ multò minus propugnat. Et verò pellucidior prout ætate procedimus evadit. Præterea variat in quorundam quadrupedum oculis, quorum choroïdes colores iridis representat. Hæc colorum varietas in retinâ non occurrit, quæ in omnibus oculis suam servat albedinem. Illa colorum uniformitas, eam objectorum impressionibus excipiendis choroïde habiliorem efficit, cujus varii colores aliis intermixti qui ab

(a) Rep.
de M. Pec-
quet à la pr.
Lett. de M.
Mariotte.

objectis oriuntur, vel maximam in visus sensu perturbationem excitare valerent.
Hisce rationum momentis innixi, concludimus:

Ergo Retina immediatum visionis organum.

DOMINI DOCTORES DISPUTATURI.

M. Carolus-Ludovicus-Maria- Gabriel DUPRÉ.	M. Ludovicus-Car. HALLOT, rei herbariæ Professor designatus	M. Joannes-Baptista-Alexan. MAIGRET.
M. Joannes-Baptista-Josephus THERI.	M. Joannes-Jacobus LE ROUX DES TILLETS Chirurgiæ Gal- lico Idiomate Professor designatus.	M. Josephus-PHILIP, anti- quus Facultatis Decanus, Academiæ Censor.
M. Joannes-Franc. MARINIER.	M. Augustinus ROUSSEL DE VAUZESME.	M. Joannes DARCET, Che- miæ Professor & Professor Regius, Academiæ Regalis Matritensis Socius.

Proponebat Parisiis ANTONIUS-PETRUS DEMOURS, Parisinus, Regis Chris-
tianissimi Medicus Ocularius designatus, Doctor Medicus Avenionensis,
necnon Saluberrimæ Facultatis Medicinæ Parisiensis Baccalaureus,
Theseos Autor. A. R. S. H. 1782.

AB OCTAVA AD MERIDIEM.



Typis QUILLAU Universitatis & Facultatis Medicinæ Typographi. 1782.